

Day fu Indijinos Peepl

Bifoa noh tu lang abak, Bileez ahn di werl mi selibrayt Aktoaba 12th az *Columbus Day*. Bot dat chaynj. Wai? Wel, nof pipl (peepl) mi don deh eena di Amerikaz bifoa *Columbus* reech ya. So, akaadin tu di UNITED NATIONS, di indijinos peepl eena di Amerikas da peepl weh mi deh ya bifoa *Columbus*. Bot sohn a wi tink seh dat Kriol da indijinos tu. Now, United Nations oanli laybl az "indijinos peepl" if di peepl mi deh ya bifoa *Columbus*. Bot "indijinos" ga wahn neks set meenin. Si di too meenin ya, fahn <https://www.dictionary.com/browse/indigenous>:

1. **indigenous**: originating in and characteristic of a particular region or country; native (often followed by *to*)
2. **indigenous** (relating to or being a people who are the original, earliest known inhabitants of a region, or are their descendants)

Soh, Kriol da indijinos wen wi kansida di fos meenin a "indigenous." YES, Kriol indijinos tu Bileez ahn evri paat weh yu fain Kriol (English= Creole) eena di werl. (Memba seh, Bileez Kriol da wan kain a "Creole"). Bot, sayk a di United Nations yooz di sekan meenin da tap, Kriol noh kwalifai fi di help fahn di UN weh indijinos pipl get.

At di lees, sohn a wi tink seh di UNITED NATIONS shuda kansida dat Kriol indijinos tu Bileez, mataz bee if Kriol noh indijinos akaadin tu di "bifoa *Columbus* meenin". Dis uda mek wi ku taak bowt **mek plays laik Gales Pt. Malanti wahn heritij sait weh dehn ku help wi oplif ahn protek!** Eniway... dat da sohntin wee Kriol ku mek naiz bowt!